

YANGI O‘ZBEKISTON

Ijtimoiy-siyosiy gazeta

№ 97 (1696), 2026-yil 14-may, payshanba



www.yuz.uz



yuz.uznews



yuz_official



yuz.uz_news



yuz.uz_news



O‘ZBEKISTON PREZIDENTI BMT AHOLISHUNOSLIK JAMG‘ARMASI RAHBARI BILAN UCHRASHUV O‘TKAZDI

O‘zbekiston Respublikasi Prezidenti Shavkat Mirziyoyev mamlakatimizga rasmiy tashrif bilan kelgan Birlashgan Millatlar Tashkiloti Bosh kotibining o‘rinbosari, Aholishunoslik jamg‘armasi (UNFPA) ijrochi direktori Diyene Keytani qabul qildi.



Uchrashuv avvalida UNFPA rahbari mamlakatimiz yetakchisiga BMT Bosh kotibi Antoniu Guterrishning salomi va samimiy tilaklarini yetkazdi.

BMTning aholishunoslik sohasidagi nufuzli instituti bilan hamkorlikning dolzarb masalalari ko‘rib chiqildi.

Keyingi yillarda O‘zbekistonning UNFPA bilan hamkorligi sifat jihatidan yangi bosqichga ko‘tarilgani ta’kidlandi. Reproduktiv salomatlik, gender tenglik, demografik barqarorlikni ta’minlash sohaslarida muhim loyihalar amalga oshirildi. Jamg‘arma mamlakatimiz tarixidagi birinchi aholi va qishloq xo‘jaligini ro‘yxatga olish jarayonida faol ishtirok etdi.

Ona va bola salomatligini mustahkamlash, yosh oilalarni qo‘llab-quvvatlash, xotin-qizlarning huquq va imkoniyatlarini himoya qilish borasidagi ijobiy natijalar alohida qayd etildi.

Hamkorlikni yanada chuqurlashtirish, jumladan, mamlakat dasturi doirasida yangi qo‘shma tashabbuslarni amalga oshirish, O‘zbekistonda va BMT doirasida yuqori darajadagi tadbirlarni o‘tkazishga kelishib olinadi.

O‘ZA

O‘zbekiston Respublikasi Prezidenti Matbuot xizmati surati.

YIRIK XALQARO KOMPANIYALAR BILAN MUNOSABATLAR YANADA KENGAYTIRILADI

O‘zbekiston Respublikasi Prezidenti Shavkat Mirziyoyev 13-may kuni “O‘zbekiston energetika haftaligi – 2026” forumida ishtirok etish uchun mamlakatimizga kelgan Ozarbayjonning “SOCAR” kompaniyasi bosh direktori Rovshan Najaf hamda “British Petroleum” kompaniyasi rahbariyati Ariel Flores va Jovanni Kristofolini qabul qildi.

Uchrashuvda energetika va neft-gaz sohasida yetakchilardan hisoblangan ushbu yirik kompaniyalar bilan o‘zaro manfaatli hamkorlikni kengaytirish masalalari ko‘rib chiqildi.

Energetika sohasidagi kooperatsiya muvaffaqiyatli kechayotgani mamuniyat bilan qayd etildi. “SOCAR” kompaniyasi Ustyurt platosidagi uglevodorod konlarini o‘zlashtirish loyihasini amalga oshirishda O‘zbekistonning sherigi hisoblanadi. “SOCAR”ning O‘zbekistondagi vakolatxonasi ochish to‘g‘risida qaror qabul qilindi.

Ushbu keng ko‘lamli loyihaga “British Petroleum” kompaniyasi qo‘shilganiga yuksak baho berildi.

Neft-gaz sohasida uglevodorod xomashyosini qidirish, qazib olish va chuqur qayta ishlash, neft va neft mahsulotlarini uzoq muddatli yetkazib berishni yo‘lga qo‘yish hamda tarmoq uchun mutaxassis kadrlar tayyorlash bo‘yicha qo‘shma loyihalarni ilgari surish muhimligi ta’kidlandi.

Bundan tashqari, Ozarbayjon futbol federatsiyalari assotsiatsiyasi raisi sifatida ham faoliyat yuritayotgan Rovshan Najaf davlatimiz rahbariga 2027-yilda O‘zbekiston va Ozarbayjonda yoshlar o‘rtasidagi U-20 jahon chempionatini o‘tkazishga birgalikda tayyorgarlik ko‘rishdagi ko‘magi uchun minnatdorlik bildirdi.

O‘ZA

TOSHKENT METROPOLITENI FAOLIYATI SAMARADORLIGINI OSHIRISH BO‘YICHA TAKLIFLAR KO‘RIB CHIQLIDI

Prezident Shavkat Mirziyoyev Toshkent metropolitenida yo‘lovchilarga xizmat ko‘rsatish sifati va xavfsizligini ta’minlash hamda infratuzilimdan foydalanish samaradorligini oshirish yuzasidan takliflar taqdimoti bilan tanishdi.

Poytaxt aholisi va mehmonlari soni ortib borayotgani, shahar kengayishi va jamoat transportiga talab oshishi metropoliteni rivojlantirishni yangi bosqichga olib chiqishni taqozo etmoqda. Shu maqsadda 2030-yilgacha metropolitenida kunlik yo‘lovchilar sonini 1,8 million nafarga yetkazish, metro bekatlari sonini 79 taga, liniyalari uzunligini 103 kilometr gacha oshirish maqsad qilingan. Shuningdek, poyezdlar harakati intervalini bosqichma-bosqich 1,5-3 daqiqagacha qisqartirish ko‘zda tutilgan.

Metropoliten infratuzilimining yaxshilash va moliyaviy sog‘lomlashtirish bo‘yicha ham qator choralar belgilanmoqda. Jumladan, 2026-2028-yillarda xizmat ko‘rsatish sifatini oshirish va fuqaro muhofazasi obyektlari texnik bazasini takomillashtirish choralarini ko‘riladi.

Yo‘lovchilar xavfsizligini kuchaytirish maqsadida “Shahriston” metro bekatlari platformalarida sinov tariqasida oynali himoya to‘siqlarini o‘rnatish taklif etildi. Xalqaro tajribaga ko‘ra, bunday to‘siqlar platformalardagi baxtsiz hodisalarni 80-90 foizgacha kamaytirish imkonini beradi. Shu bilan birga, ular qo‘shimcha reklama maydonlarini yaratish orqali daromadlarni oshirishga ham xizmat qiladi.

Yana bir muhim yo‘nalish — yangi liniyalari qurilishi. Xususan, “Mingo‘rik — Chilonzor buyum bozori” metropoliten liniyasi bo‘yicha loyiha baholash hujjatlarini ishlab chiqish rejalashtirilgan. Birinchi bosqichda “Mingo‘rik — Janubiy vokzal” yo‘nalishi, ikkinchi bosqichda esa “Janubiy vokzal — Chilonzor buyum bozori” yo‘nalishini qurish imkoniyatlari o‘rganiladi.

Metropolitenida qo‘shimcha daromad manbalarini shakllantirish masalalariga ham alohida e’tibor qaratildi. Vagon va platformalarda raqamli reklama maydonlarini auktsion orqali xususiy sektorga ijaraga berish, metro bekatlarida vending apparatlarini, kichik savdo obyektlarini joylashtirish, stansiyalar oldida avtoturargohlar tashkil etish rejalashtirilmoqda. Shuningdek, bo‘sh turgan bino va xonalarni kovorking va kichik ofis sifatida tadbirkorlarga auktsion asosida ijaraga berish taklif etildi.

Avtotransportdan metro tizimiga qulay o‘tishni ta’minlash maqsadida “Park&Ride” tizimini yo‘lga qo‘yish taklif qilindi.

Taqdimotda harakat tarkiblarini yangilash va elektrodepo qurish masalalari ham muhokama qilindi. 2027-2030-yillarda metropoliten uchun talab etiladigan harakat tarkiblarini xarid qilish bo‘yicha takliflar

ishlab chiqildi. Shu munosabat bilan yangi harakat tarkiblari uchun elektrodepo qurishga zarur yer maydoni ajratiladi.

Shuningdek, 2027-2035-yillarda Toshkent metropolitenini rivojlantirish strategiyasini ishlab chiqish belgilanmoqda. Unda metropoliten tarmoqlarini ikki barobarga kengaytirish, yo‘lovchi tashish hajmini 2,5 barobarga oshirish, ekologik barqaror, energiya tejamkor va xavfsiz transport tizimini yaratish, servis sifati va yo‘lovchilar uchun qulayliklarni yanada oshirish vazifalari qamrab olinadi.

Yo‘lkira haqini to‘lash tizimini takomillashtirish bo‘yicha ham takliflar bildirildi. Xorijiy tajriba asosida masofaga qarab to‘lash, aholi toifalari uchun imtiyozlar, kunlik, haftalik va oylik abonementlar tizimini joriy etish imkoniyatlari o‘rganiladi.

Prezidentimiz jamoat transporti, ayniqsa, metropoliten yirik shahar hayotida eng muhim infratuzilmalardan biri ekanini ta’kidladi. Shu bois, xizmat sifati, xavfsizlik, moliyaviy barqarorlik va zamonaviy boshqaruvni bir-biri bilan uzviy bog‘liq holda rivojlantirish zarurligi qayd etildi. Taqdim etilgan takliflar ma’qullanib, ularni amalga oshirish yuzasidan mutasaddilarga topshiriqlar berildi.

O‘ZA

BIZ YO‘LGA CHIQLDIK!



Birlashgan o‘zar

Yaqinda Respublika Ma’naviyat va ma’rifat markazi hamda uning huzuridagi “Ma’rifat” targ‘ibotchilar jamiyati tashabbusi bilan “Renessans” kino uyida Madaniyat, Oliy ta’lim, fan va innovatsiyalar vazirligi, Yozuvchilar uyushmasi, O‘zbekiston mahallalari uyushmasi, Kinematografiya agentligi, tegishli tashkilot va idoralari bilan hamkorlikda ijtimoiy-ma’naviy, ma’rifiy tadbir o‘tkazildi.

Taniqli madaniyat va san’at xodimlari, mamlakat ziyolilari vakillari ishtirok etgan ushbu tadbirni o‘tkazishdan maqsad Prezidentimizning “O‘zbekiston Respublikasi davlat mustaqilligining 35 yilligini keng nishonlashga tayyorgarlik ko‘rish va uni o‘tkazish to‘g‘risida”gi qarorini amalga oshirish

bilan bog‘liq masalalarni ko‘rib chiqish va vazifalarni belgilab olish edi.

Bu yilgi istiqlol bayrami “Yagona Vatan, yagona xalq bo‘lib, yangi hayot va kelajak yaratamiz!” degan bosh g‘oya ostida o‘tkazildi. Ushbu g‘oya jamiyatni yanada jipslashtirish, milliy birlikni mustahkamlash, mamlakatda

barqaror ijtimoiy-ma’naviy muhitni yaratish yo‘lidagi navbatdagi zalvorli, dadil qadamlardan biridir. Shu maqsadda joriy yilning aprel-sentabr oylarida ilm-fan, ta’lim, madaniyat, adabiyot va san’at namoyandalari, sportchilar, jamoatchilik vakillaridan iborat badiiy guruhlari tuzish hamda ular bilan birgalikda respublika bo‘ylab keng ko‘lamli ma’naviy-ma’rifiy tadbirlar va ijtimoiy loyihalarni amalga oshirish ko‘zda tutilgan.

“Renessans” kino uyida to‘plangan taniqli olimlar, ziyolilar “Yagona Vatan, yagona xalq bo‘lib, yangi hayot va kelajak yaratamiz!” degan bosh g‘oyani keng xalq ommasida targ‘ib etishning samarali yo‘llari, bu borada oldinda turgan ishlar to‘g‘risida kelishib oldi. Tadbir ishtirokchilarining “Millatni birlashtirish, yagona Vatan, yagona xalq bo‘lishimiz uchun, eng avvalo, o‘zimiz birlashib olaylik!” degan fikrlari tadbirning bosh mavzularidan biriga aylandi.

Haqiqatan, xalqimizda “Birlashgan o‘zar, birlashmagan to‘zar” degan maqol bor. Biz mustaqillik yillarida nimaga erishgan bo‘lsak, bularning bari birlashganimiz, oldimizga buyuk maqsadlar qo‘yib, ularni bajarish yo‘lida o‘zimizni safarbar eta olganimiz tufaylidir. Shu ma’noda, tadbir ishtirokchilarining “Millat va Vatan manfaatlarini yo‘lida qo‘lga berib birlashaylik!” degan chaqiriqlari butun jamiyat a’zolari qalbiga yetib boradigan da’vat bo‘ldi.

Davomi 3-beta

BARQAROR RIVOJLANISH MAQSADLARI — HISOBOTLARDA EMAS, XALQ TURMUSHIDA AKS ETAYOTGAN HAYOTIY MEZON

Barqaror rivojlanish maqsadlari (BRM) ko‘rsatkichlarini inson qadri, mahalla obodligi va hayot sifati bilan bog‘lash vaqti keldi. Chunki bu haqda gap ketganda, ko‘pincha xalqaro reytinglar, milliy indikatorlar, strategiya va hisobotlar tilga olinadi. Albatta, bularning barchasi muhim. Zero, har qanday davlat o‘z taraqqiyot yo‘lini aniq raqamlar, solishtirma ma’lumotlar va xalqaro mezonlar orqali belgilaydi.

Ammo oddiy inson uchun barqaror rivojlanish tushunchasi butunlay boshqacha ma’noga ega. Ya’ni bu uyda toza ichimlik suv bo‘lishi, farzandi yaxshi maktabda o‘qishi, poliklinikada soatlab navbat kutmasligi, yoshlarning ish topishi, mahallada yo‘l va yoritish yaxshilanishi, havoning tozaligi, tadbirkorning ortiqcha to‘siqlarsiz ishlashi, davlat idorasida masalasi adolatli hal bo‘lishidir.

Shu ma’noda, BRM faqat BMT kun tartibi yoki xalqaro majburiyat emas. U, avvalo, inson qadri, oila farovonligi, mahalla obodligi va mamlakat kelajagini ta’minlaydigan hayotiy mezonidir.

O‘zbekiston so‘nggi yillarda BRMni milliy taraqqiyot siyosati

bilan uyg‘unlashtirish borasida muhim institutsional asos yaratdi. “O‘zbekiston — 2030” strategiyasi mamlakatning keyingi taraqqiyot bosqichini inson salohiyati, ijtimoiy adolat, iqtisodiy o‘rinish, ekologik barqarorlik va xalq xizmatidagi davlat boshqaruvi bilan bog‘laydi. Biroq bugungi bosqichda eng muhim savol quyidagicha qo‘yilishi kerak: mazkur maqsadlar oddiy odamlar hayotida qanchalik sezilayapti?

Chunki taraqqiyotning haqiqiy mezoni faqat yalpi ichki mahsulot o‘rinishi, reytingdagi o‘rin yoki qabul qilingan dasturlar soni bilan o‘lchanmaydi. U odamlarning kundalik hayotidagi o‘zgarish bilan baholanadi.

Davomi 4-beta

CHIN GAPLAR ELNI TOTUVLIKKA CHORLAYDI

“Yangi O‘zbekiston” gazetasining shu yil 12-maydagi 95-sonida O‘zbekiston xalq shoiri Usmon Azimning “Riyosiz so‘zlar” maqolasi e’lon qilindi. Uni o‘qir ekanman, yaqin tariximiz ko‘z oldimda jonlanib, so‘nggi yillardagi islohotlar ko‘lamini, shiddatini yurak-yurakdan his etdim. Dildan tilga ko‘chgan chin gaplar elni totuvlikka chorlashiga amin bo‘ldim.

Davomi 2-beta



